

25 año Reina: **Beatrix**

Tabata un 31 di Januari 1938. Na Hulanda tabata 'hartje winter', pero paden den palacio di Soestdijk tabata tin alegria, prinses Beatrix Wilhelmina Armgard a nace.

Beatrix y su rumannan Irene, Magriet y Christina a biba pa algun año na Canada, como cu na Hulanda tabata peligroso, como cu tabata tin e Segundo Guerra Mundial e tempo ey. Ta te despues di e guerra, na 1945, Beatrix a conoce realmente e pais cu e lo hereda como reina un dia.

Contrario na su mama Juliana, y wela Wilhelmina, Beatrix a conoce un libertad enorme mientras cu e tabata creciendo na Canada. Pa cuminsa e tabata tin mas ruman, y ta p'esey no ta tur atencion tabata bai na n'e. Su mama y wela tur dos tabata unico yiunan di nan mayornan.

Beatrix a bai un scol unda cu tabata tin muchanan di tur clase. Y despues cu e fiebre di tin "un prinses den klas" a pasa, no tur ora tur mucha kier hunga cune, tur tabata consider'e igual. Y e mesun muchanan aki tabata considera e security cu tabata cana cu Beatrix un 'omo'.

Pero ora cu e tabata bek na Hulanda cosnan a cambia. Di tur e muchanan den su klas na Hulanda awor, e tabata e unico cu tabata tin un wela cu ta reina, y tabata haya bishitanan na su cas manera Winston Churchill y Dwight Eisenhower, e no mester a laba tayo, ni tene su camber na ordo. E tabata tin un chauffeur cu tabata hib'e tur caminda. Y ora e haci año, casi tur edificio na Hulanda tabata hisa nan bandera na su honor.

Tempo cu el a cumpli 18 año, cosnan a cambia poco mas, no solamente e tabata e prinses heredero, sino tambe cu e mester a cumpli cu mas obligacionnan. Tambe tabata e año cu el a cuminsa cu su estudionan na Leiden. E tabata studia hopi cos, y esaki den combinacion cu su obligacionnan pa cu Reino como e prinses heredero.

Despues di a caba cu su estudionan na 1961, e tabata biaha hopi, algo cu e tin di su tata, prins Bernard, cu tambe ta gusta conoce mundo.

Na 1966 Beatrix a casa cu Claus von Amsberg. E pueblo Hulandes no tabata kier a tende, menos mira e homber aki, como cu no solamente e ta Aleman, un rasa cu nan tabata contra pa via di tempo di guerra, pero cu e tabata forma parti di e cuerpo hubenil di militarnan di Hitler y ta daño so e lo haci na e Famia Real.

Pero e pueblo a síña conoce Claus na un otro manera y a acept'e. Beatrix a laga sa si, cu si e mester kies pa amor of pa deber, e lo kies pa su deber, como cu amor pa su pais ta mas importante. Pero ta bon mes no mester a yega asina leu. Nos sa cu durante tur e añanan cu a pasa, te na su morto na 2003, Claus tabata un homber bondadoso, cu stima no solamente su famia, pero tambe e pais y e pueblo cu e ta forma parti di dje.


Un año despues cu Beatrix y Claus a casa, su prome yiu a nace, e actual prins heredero Willem Alexander. Sigui na 1968 pa Johan Friso, y por ultimo Constantijn na 1969.

Na 1980, Reina Juliana a dicidi di laga su reinado den man di su yiu Beatrix. Esaki tabata pa di dos biaha den historia di Hulanda cu un reina ta haci esaki. Wilhelmina tambe a haci mescos cu Juliana na 1948.



E reinado di Beatrix a conoce hopi modernismo. Por bisa cu Beatrix ta un reina cu ta traha duro, t'ey den momentonan di felicidad y tristesa, semper fuerte, semper sigur. Tin biaha ta bisa cu e ta un hende hopi seco, sin cariño, pero ora por mir'e den famia, e ta keda un mama cu ta stima su yiunan y nietonan. E stima su pais, su reino y su hendenan.

Ya ta 25 año pasa cu el a bira reina, y por ta sigur cu e lo t'ey pa basta tempo mas, sin tin miedo cu si un dia e bai of abdica, e monarquia lo ta den bon man di su yiu Willem Alexander.



Riba e foto aki'riba por mira **Reina Beatrix** cu su yiu mas grandi y alaves prins heredero (kroonprins) **Willem-Alexander**, prinses **Maxima**, casa di e prins y nan yiu, prinses **Catharina Amalia**, cla pa supla e bela, celebrando asina e prome cumpleaños di e prinses. La reina tin 2 nieto mas, yiunan di **Constantijn** y su casa **Laurentien**, cu ta e yiu di mas chikito, y e año aki e lo haya 2 mas, pasobra Willem-Alexander y Maxima, como tambe **Johan Friso** y **Mabel** ta sperando baby pa mitar di e año aki.



Chabalito

Number 7 - Año VII - Afl. 2,=

